

«Unbelievable!»

Da live-tickers e blera aria stgaudada al Forum d'economia mundial a Tavau

DA DAVID TRUTTMANN / FMR

Co nus avain spetgà e bramà quest mument. Il 50avel WEF. Ubain «FEM» per bun rumantsch. Ier è stada l'avertura. E per la segunda giada è el arrivà a Tavau. Il pli pussant um dal mund. Donald Trump a Davos/Tavau. Unbelievable!

Gia dis ordavant tschantan schurnalistas e schurnalists las dumondas centralas: Vegna'l? U na vegna'l betg? Ensemen cun tgi? E cun tgenin aviun? E cun quant personal da segirtad? Ils live-tickers vegnan chargiads bravamain. Igl è nunpussavel da suandar e legger tut ils tickers.

Perquai offrin nus en quest lieu ina selezziun dals live-tickers da l'avantmezdi d'avertura dal 50avel FEM. Exclusiv e top-actual, l'avantmezdi dals 21 da schaner 2020.

Enturn las 07.00: Tut ils tickers efan il bainvegna al 50avel FEM. Il portal «Watson» quinta anc ina giada ensemen quant che la segirtad al FEM custa: passa 40 milliuns francs. Da quels paja il FEM sez 2,25 milliuns, il chantun Grischun var nov milliuns e la confederaziun 32 milliuns francs.

Alas 07.39 rapporta il «Blick» che Greta Thunberg, l'activista svedaisa che renda attent als privels dad in stgaudament climatic, saja puspè sauna. Ella saja sa revegnida dad in dafrad. No joke!



Entant che l'attenziun mediala è stada focussada ferm sin l'arrivada da Donald Trump a Tavau èn activistas ed activists dal clima marschads tras il Partenz vers Tavau. FOTO RTR

Alas 08.32 rapporta il «Blick» dal podium cun Greta Thunberg. Quella appellescha l'economia mundiala da bandunar uschè spert sco pussavel d'exploitar las resursas fossilas.

Al medem mument mussa il «Tages-Anzeiger» in video co il grond coloss da kerosin «Air Force One» dal president american sa platga a Turitg, per sgular alura vinavant cun in'escorta da plirs helicopters enfin si Tavau.

Alas 9.37: Il «Blick» mussa ina fotografia da l'automat da bavrondas al FEM. In automat plain Pepsi, Lipton Ice Tea e Tropical. Surprendentamain per il «Blick» èn quai tut buttiglias da vaider e betg da PET. Ed il «Blick» sa dumonda sche quai saja uss in statement ecologic dals organisateurs. La dumonda na

vegn deplorablmain betg respundida.

Apartir da las 09.40 sa platga a Tavau, inclusiv president american.

Alas 10.44: Il correspondent spezial dad SRF valitescha ch'i dettia oz in di plain tensiun, ch'ins possia surtut esser spanegia sin il pled da Trump.

Alas 10.46: SRF rapporta che las pistas da skis a Tavau sajan oz vidas, malgrà la bell'aura.

Alas 10.51 porta il cardinal Peter Kodwo Appiah Turkson ils salids da papa Francesc, il qual na possia betg esser preschent, il qual appelleschia al dialog e da betg metter l'egoissem en il focus.

Alas 11.09: Tut ils tickers rapportan dal pled d'avertura da la presidenta da la confederaziun Simonetta Sommaruga. Tut bufatg di ella: «Il mund arda.» Ed ella manegia quai concretamain per l'Australia e metaforicamain per il clima. Entant spetga tut sin il pled da Trump, il qual n'è gnanc en sala.

Tranter las 11.20 e las 11.50 spetgan tut ils tickers sin l'arrivada da Trump.

Alas 11.45 mussa SRF live ina grupp da nov jodladers che pon chantar e surpuntar il temp tranter il pled da Sommaruga e quel da Trump. Nice jodel!

Finalmain – a las 11.50 il pled dal president american Donald Trump. El lauda sasez. El lauda Donald Trump. El lauda il president american. El lauda sia regenza. El lauda la politica economica geniale da quella. A la fin menziuna l'anc curt il clima, renda però attent che ses agen pajais haja – forse er grazia ad el – la pli schubra aua ed aria. Unbelievable.

Dal rest: A las 11.25 rapporta il live-ticker dad SRF ch'il catering al FEM mettia grond pais sin spaisas vegetarianas, charn co-tschna dettia mo tar in sulet menu. Damai pauca charn e «pac rost» a Tavau. Uschia ch'i fiss era chattada la conclusiun da quest avantmezdi da ticker al FEM, analog ad in proverbial engiadinais: «Bler füm e pac rost.» U per bun rumantsch: «unbelievable».